

SAMÞYKKT

um hunda- og kattahald í Norðurþingi.

I. KAFLI

Hundahald.

1. gr.

Hundahald í Norðurþingi sætir þeim takmörkunum sem getið er um í samþykkt þessari.

2. gr.

Hundahald er háð leyfi sveitarstjórnar sem getur veitt lögráða einstaklingum, búsettum í sveitarfélaginu, leyfi til hundahalds að uppfylltum þeim skilyrðum sem samþykkt þessi kveður á um.

3. gr.

Leyfið er bundið við nafn og heimili lögráða einstaklings og er óheimilt að framselja það.

4. gr.

Hundurinn skal skráður á skrifstofu sveitarfélagsins, eða hjá umboðsaðila, og þar fær eigandi hundsins afhenta númeraða plötu sem jafnan skal vera í ól um háls hundsins. Við skráningu skal eigandi/umráðamaður framvísa vottorði frá dýralækni um örmerkingu eða húðflúrmerkingu og spóluormahreinsun hundsins, samanber 3. mgr. 4. gr. reglugerðar nr. 1077/2004 um aðbúnað og umhirðu gæludýra og dýrahald í atvinnuskyni. Leyfishafi skal tilkynna ef hundurinn drepst eða er fluttur úr sveitarfélaginu.

5. gr.

Árlega skal sveitarsjóði greitt gjald fyrir þá hunda sem leyfi er veitt fyrir. Sveitarstjórn ákveður árlega upphæð gjaldsins í sérstakri gjaldskrá sem sett er í samræmi við ákvæði 25. gr. laga nr. 7/1998 um hollustuhætti og mengunarvarnir að fenginni umsögn heilbrigðisnefndar og birt í B-deild Stjórnartíðinda. Gjöld mega aldrei vera hærri en sem nemur rökstuddum kostnaði við veitta þjónustu eða framkvæmd eftirlits með einstökum þáttum. Gjaldið skal greitt í fyrsta sinn við skráningu hundsins og síðan árlega fyrirfram með gjalddaga 1. maí. Hafi gjaldið ekki verið greitt innan tveggja mánaða frá gjalddaga fellur leyfið sjálfkrafa úr gildi. Dragist lengur en tvo mánuði að skrá hund á skrifstofu sveitarfélagsins er heimilt að innheimta tvöfalt skráningargjald. Við greiðslu gjalds skal ár hvert framvísa vottorði frá dýralækni um að hundurinn hafi verið hreinsaður af bandormum og spóluormum. Hreinsunargjald er innifalið í árlegu gjaldi til sveitarsjóðs.

6. gr.

Sveitarfélagið kaupir ábyrgðartryggingu fyrir alla skráða, leyfisskylda hunda og er iðgjaldið innifalið í árlegu gjaldi leyfishafa til sveitarsjóðs.

7. gr.

Innan þéttbýlismarkna skal hundur aldrei ganga laus heldur vera í taumi í fylgd aðila sem hefur fullt vald yfir honum. Þegar hundur er í festi á lóð skal lengd festarinnar við það miðuð að þeir sem réttmætt erindi eiga inn á lóðina geti óhindrað sinnt þeim.

8. gr.

Utan þéttbýlismarka er heimilt að sleppa hundi lausum undir eftirliti umsjónarmanns, án þess þó að gengið sé á rétt viðkomandi landeiganda.

9. gr.

Hundaeigandi skal gæta þess að hundur hans valdi ekki hættu eða raski ró manna eða verði mönnum til óþæginda á neinn annan hátt. Umráðamönnum hunda er alltaf skylt að fjarlægja saur eftir hundinn.

10. gr.

Óviðkomandi skulu ekki gefa sig að hundum með klappi eða öðru atferli, nema með leyfi eiganda eða umráðamanns.

11. gr.

Bannað er að fara með hunda á almennar útsamkomur.

12. gr.

Ekki má hleypa hundum inn í húsrými eða á lóðir sem fjallað er um í fylgiskjali 3 í reglugerð um hollustuhætti. Um matvælafyrirtæki fer samkvæmt ákvæði reglugerðar um matvælaeftirlit og hollustuhætti við framleiðslu og dreifingu matvæla. Ekki má heldur hleypa hundum inn í húsnæði vatnsveitna, sbr. reglugerð um neysluvatn og ölkelduvatn. Ákvæði þessarar greinar gilda þó ekki um nytjahunda að störfum.

Framangreindir staðir eru m.a. eftirfarandi:

1. Vatnsveitur, vatnsból og verndarsvæði þeirra, brunnar og sjóveitur.
2. Almennings- og útisalerni.
3. Hvers konar sorpgeymslur og sorpförgunarstaðir.
4. Gististaðir, veitingastaðir og matsólustaðir.
5. Tjald- og hjólhýsasvæði, nema skv. ákvörðun umsjónaraðila.
6. Húsakynni þar sem geymd eru, framleidd eða seld matvæli.
7. Skólar, kennslustaðir, barnaheimili og gæsluvellir.
8. Rakarastofur, hárgreiðslustofur, hvers konar snyrti- og sólbaðsstofur.
9. Heilbrigðisstofnanir, hæli, heilsuræktar- og íþróttastöðvar og baðstaðir.
10. Fangelsi og aðrar vistarverur handtekinna manna.
11. Samkomuhús hvers konar og almennar skrifstofur.
12. Kirkjugarðar, bálstofur, líkhús og líkgeymslur.
13. Almenn samgöngutæki.

13. gr.

Óheimilt er að láta hunda dvelja lengur en í tvo mánuð á heimili án þess að sótt sé um leyfi fyrir þeim.

14. gr.

Óheimilt er að hafa fleiri en tvo hunda eldri en þriggja mánaða á sama heimili.

15. gr.

Hundaeiganda ber að hlíta að öðru leyti lögum og reglum er hundahald varðar, þ. á m. reglum um árlega hreinsun hunda og greiðslu leyfisgjalds, sbr. 5. gr., svo og fyrirmælum sem heilbrigðisnefnd setur.

16. gr.

Um hundahald í fjöleignarhúsum fer að 13. tl. A-liðar 41. gr. laga nr. 26/1994 um fjöleignarhús. Ef sótt er um að halda hund í fjöleignarhúsi, skal skriflegt samþykki allra íbúðareigenda í sama stigagangi fylgja umsókn. Sé um að ræða raðhús eða parhús skal samþykki aðliggjandi íbúða (íbúðar) fylgja umsókn. Í fjöleignarhúsi þar sem sér inngangur fylgir íbúð, þarf ekki samþykki allra íbúðaeigenda. Afla skal samþykkis nýrra íbúðaeigenda í íbúðum þar sem hundur er fyrir. Íbúðaeigendur geta skriflega afturkallað samþykki sitt. Við afturköllun samþykkis eða synjun nýrra íbúðaeigenda skal hundaeigandi fá hæfilegan frest til þess að finna hundinum annan samastað.

17. gr.

Sveitarstjórn getur fellt niður eða ákveðið lægra gjald fyrir nytjahunda, þ.e. hunda sem notaðir eru til löggæslu- eða björgunarstarfa og minkahunda. Af leiðsöguhundum sem blindir eða sjóndaprir nota vegna fötlunar sinnar skal ekki greiða gjald.

18. gr.

Eftirfarandi skilyrði gilda í dreifbýli Norðurlands:

1. Ekki þarf að sækja um leyfi fyrir hundahaldi á lögbýlum en skylt er að skrá hundana á skrifstofum Norðurlands eða hjá umboðsaðila.
2. Ekki þarf að greiða leyfisgjald af hundum í dreifbýli. Þó skulu eigendur hunda greiða þann kostnað sem af lögbundnum hreinsunum og lækniáðgerðum hlýst, sbr. 5. gr. eftir því sem við á. Sömu leiðis ber eiganda að greiða þann kostnað sem af hlýst ef hundurinn er tekinn í vörslu eða hann aflífaður, sbr. 20. gr.
3. Hundar í dreifbýli mega ganga lausir á landareign eigenda sinna. Að öðru leyti gilda ákvæði samþykktar þessarar eftir því sem við á.

19. gr.

Við skráningu skal hundaeigandi undirrita yfirlýsingu um að hann skuli í einu og öllu fara með hund sinn eftir fyrirmælum samþykktar þessarar eins og hún er nú eða kann síðar að verða.

20. gr.

Við brot á skilyrðum fyrir leyfi til hundahalds má fjarlægja viðkomandi hund. Handsömun á ómerktum hundi skal auglýsa tryggilega, t.d. í staðarblaði. Eigandi hundsins skal leysa hann út gegn greiðslu handsömunargjalds og annars kostnaðar vegna brotsins. Sé um að ræða alvarlegt brot eða ítrekað brot afturkallast viðkomandi leyfi til hundahalds.

Hunda sem ráðast á menn eða skepnur skal fjarlægja og er heimilt að lóga þeim þegar í stað. Aðra hunda er heimilt að afhenda ef þeirra er vitjað innan 7 daga frá því að hundurinn var handsamaður enda verði handsömunargjald og annar áfallinn kostnaður greiddur áður en það er gert. Að öðrum kosti er heimilt að lóga hundinum enda sé eiganda gert ljóst hvað vanræksla á að vitja hundsins geti haft í för með sér. Kostnaður greiðist af eiganda.

Sveitarstjórn er heimilt hvenær sem er að afturkalla leyfi fyrir einstökum hundum eða öll veitt leyfi telji hún það nauðsynlegt í þágu hollustuhátta og öryggismarkmiða.

21. gr.

Handsömunargjald samkvæmt 20. gr. skal vera samkvæmt gjaldskrá sem ákveðin er af sveitarstjórn og sett er í samræmi við ákvæði 25. gr. laga nr. 7/1998 um hollustuhætti og mengunarvarnir að fenginni umsögn heilbrigðisnefndar og birt í B-deild Stjórnartíðinda.

II. KAFLI

Kattahald.

22. gr.

Kattahald í Norðurþingi sætir þeim takmörkunum sem samþykkt þessi kveður á um.

23. gr.

Kattahald er háð leyfi sveitarstjórnar sem getur veitt lögráða einstaklingum, búsettum í sveitarfélaginu, leyfi til kattahalds að uppfylltum þeim skilyrðum sem samþykkt þessi kveður á um.

Óheimilt er að hafa fleiri en 2 ketti eldri en 3ja mánaða á sama heimili. Leyfið er bundið við nafn og heimilisfang lögráða einstaklings og óheimilt er að framselja það. Leyfið er einnig bundið við þann kött sem sótt er um heimild fyrir hverju sinni.

24. gr.

Um kattahald í fjöleignarhúsum fer að 13. tl. A-liðar 41. gr. laga nr. 26/1994 um fjöleignarhús. Ef sótt er um leyfi til að halda kött í fjöleignarhúsi skal skriflegt samþykki allra íbúðaeigenda í sama stigagangi fylgja umsókn. Sé um að ræða parhús eða raðhús skal fylgja umsókn skriflegt samþykki eigenda aðliggjandi íbúða. Í fjöleignarhúsi með sérinngangi fyrir hverja íbúð þarf ekki að fylgja leyfi allra íbúðaeigenda. Afla skal samþykkis nýrra íbúðaeigenda í íbúðum þar sem köttur er fyrir. Íbúðaeigendur geta skriflega afturkallað samþykki sitt. Við afturköllun samþykkis eða synjun nýrra íbúðaeigenda skal kattaiegandi fá hæfilegan frest til að finna kettinum annan samastað.

25. gr.

Leyfisgjald skal greiða árlega til sveitarsjóðs eftir gjaldskrá sem sveitarstjórn samþykkir og birt er í B-deild Stjórnartíðinda. Gjald skal greitt fyrirfram í fyrsta sinn við skráningu og síðan árlega fyrir 1. maí ár hvert. Gjöld mega aldrei vera hærri en sem nemur rökstuddum kostnaði við veitta þjónustu eða framkvæmd eftirlits með einstökum þáttum. Hafi gjaldið ekki verið greitt innan tveggja mánaða frá gjalddaga fellur leyfið sjálfkrafa úr gildi. Við greiðslu gjalds skal ár hvert framvísa vottorði dýralæknis um að kötturinn hafi verið hreinsaður af spóluormum. Einnig skal framvísa öðrum skilríkjum sem máli skipta. Hreinsunargjald er innifalið í árlegu gjaldi sem greiðist í sveitarsjóð.

26. gr.

Sveitarfélagið kaupir ábyrgðartryggingu fyrir alla skráða ketti og er iðgjaldið innifalið í árlegu gjaldi leyfishafa til sveitarsjóðs.

27. gr.

Allir heimiliskettir skulu skráðir á skrifstofu sveitarfélagsins eða hjá umboðsaðila og þar fær eigandi afhenta númeraða plötu með skráningarnúmeri kattarins. Plötunni skal koma fyrir á ól sem hengd er um háls kattarins ásamt bjöllu. Við skráningu skal eigandi/umráðamaður framvísa vottorði frá dýralækni um örmerkingu eða húðflúrmerkingu og spóluormahreinsun kattarins, samanber 3. mgr. 4. gr. reglugerðar nr. 1077/2004 um aðbúnað og umhirðu gæludýra

og dýrahald í atvinnuskyni. Leyfishafi skal tilkynna ef kötturinn drepst eða er fluttur úr sveitarfélaginu.

28. gr.

Eigendum katta er skylt að gæta þess, eftir því sem unnt er, að köttur hans valdi ekki tjóni, hættu, óþægindum, óþrifum, eða raski ró manna.

29. gr.

Óheimilt er að hleypa köttum inn í húsrými eða á lóðir sem fjallað er um í fylgiskjali 3 í reglugerð um hollustuhætti (sjá 12. gr. samþykktar þessarar). Um matvælafyrirtæki fer samkvæmt ákvæðum reglugerðar um matvælaeftirlit og hollustuhætti við framleiðslu og dreifingu matvæla. Ekki má heldur hleypa köttum inn í húsnæði vatnsveitna, sbr. reglugerð um neyslu- og ölkelduvatn

30. gr.

Kettir skulu ekki vera lausir úti við í þéttbýli. Sérstaklega skulu kattaeigendur gæta dýra sinna með tilliti til fuglalífs á varptímanum.

31. gr.

Við brot á skilyrðum fyrir leyfi til kattahalds má fjarlægja viðkomandi kött. Eigandi kattarins skal leysa hann út gegn greiðslu handsömunargjalds og alls annars kostnaðar vegna brotsins. Sé um að ræða alvarlegt eða ítrekað brot, afturkallast viðkomandi leyfi til kattahalds.

Handsömun á ómerktum ketti skal auglýsa tryggilega, t.d. í staðarblaði. Sé kattarinn ekki vitjað innan 7 daga, frá birtingu auglýsingar, má aflífa hann. Komi síðar í ljós hver átti köttinn má krefja eiganda um greiðslu alls kostnaðar. Aflífa má kött sé hans ekki vitjað innan tveggja daga frá því að eiganda var tilkynnt um handsömun hans, enda sé eiganda gert ljóst hvað vanræksla á að vitja kattarins geti haft í för með sér. Kostnaður greiðist af eiganda.

Sveitarstjórn er heimilt hvenær sem er að afturkalla leyfi fyrir einstökum köttum eða öll veitt leyfi telji hún það nauðsynlegt í þágu hollustuhátta og öryggismarkmiða.

32. gr.

Sveitarstjórn er heimilt að gera ráðstafanir til útrýmingar á villiköttum og er henni þá skylt að auglýsa það tryggilega, t.d. í staðarblöðum eða útvarpi.

33. gr.

Ákvæði 23., gr. 25. gr. og 27. gr. gilda ekki um ketti í dreifbýli.

III. KAFLI

Eftirlit og fleira.

34. gr.

Sveitarstjórn tilnefnir eftirlitsaðila sem fer með framkvæmd samþykktarinnar í umboði heilbrigðisnefndar og ber að sjá um að framfylgt sé ákvæðum samþykktar þessarar. Heimilt er að skipa fleiri en einn aðila til verksins og setur sveitarstjórn nánari starfsreglur.

35. gr.

Þéttbýlisstaðir þeir sem um ræðir í samþykkt þessari eru: Húsavík, Kópasker, Raufarhöfn og Hríssateigur.

36. gr.

Brot gegn samþykkt þessari varða sektum rúmist þau jafnframt innan refsíákvæða hlutaðeigandi laga, nema þyngri refsing liggji við samkvæmt öðrum lögum. Skulu þau brot sæta þeirri málsmeðferð sem boðin er í lögum nr. 19/1991 um meðferð opinberra mála.

37. gr.

Samþykkt þessi sem samþykkt er af sveitarstjórn Norðurþings staðfestist hér með samkvæmt 25. gr. laga nr. 7/1998 um hollustuhætti og mengunarvarnir með síðari breytingum og öðlast þegar gildi. Frá sama tíma fellur úr gildi samþykkt um hundahald á Húsavík nr. 567/1991 og samþykkt um kattahald í Húsavíkarkaupstað nr. 175/1995.

Umhverfisstjórnuneytinu, 5. september 2008.

F. h. r.

Sigríður Auður Arnardóttir.

Sigurbjörg Sæmundsdóttir.